

Confraría de pescadores de O Barqueiro

RESOLUCIÓN DA CONSELLERÍA DO MAR PARA APROBAR O PLAN DE XESTIÓN CONXUNTO DE NOVA INCORPORACIÓN PARA A CONSERVACIÓN E EXPLOTACIÓN DA ANEMONE (*ANEMONIA VIRIDIS*) DURANTE OS ANOS 2023 E 2024 NA MODALIDADE DE MERGULLO CON SUBMINISTRO DE AIRE DENDE EMBARCACIÓN DAS CONFRARÍAS DE PESCADORES DE O BARQUEIRO E ESPANTE (PE410A 2022/1-2).

ANTECEDENTES

1. O 28.09.2022, a Confraría de Pescadores de O Barqueiro presentou unha solicitude (Nº rexistro 2022/2379728) para a aprobación dun plan de xestión conxunto de nova incorporación para a conservación e explotación anemone (*Anemonia viridis*) durante os anos 2023 e 2024 na modalidade de mergullo con subministro de aire dende embarcación das Confrarías de pescadores de O Barqueiro e Espante (PE410A 2022/1-2).
2. O 01.12.2022, a axente de extensión pesqueira da Xefatura Territorial de Celeiro emite un informe sobre condicións organizativas do plan de xestión.
3. O 09.12.2022, o biólogo da Xefatura Comarcal da Consellería do Mar en Ferrol emitiu un informe biolóxico sobre o plan de xestión.
4. O 18.01.2023 a Xefatura Territorial da Consellería do Mar en Celeiro como órgano instrutor que avaliou a proposta de plan presentada pola entidade, emitiu unha proposta favorable coas condicións de aprobación, que trasladou á entidade para que formulase nun prazo de 5 días hábiles as alegacións que considerase oportunas. A proposta da xefatura territorial tamén foi elevada á Dirección Xeral de Desenvolvemento Pesqueiro.
5. Transcorrido o prazo a confraría non presentou alegacións respecto da proposta da xefatura territorial.
6. O 28.02.2023 a Dirección Xeral de Desenvolvemento Pesqueiro emite unha proposta de aprobación do plan de xestión conxunto de nova incorporación para a conservación e explotación da anemone (*Anemonia viridis*) durante os anos 2023 e 2024 na modalidade de mergullo con subministro de aire dende embarcación das confrarías de pescadores de O Barqueiro e Espante (PE410A 2022/1-2).

CONSIDERACIÓN LEGAL

1. A Lei 11/2008 de Pesca de Galicia (DOG núm. 243, do 16.12.2008), establece que a política da Administración autonómica terá entre outros obxectivos, en relación coa conservación e a xestión dos recursos pesqueiros e marisqueiros, o establecemento e a regulación de medidas dirixidas á conservación, á xestión e á explotación responsable, racional e sustentable dos recursos mariños vivos. Entre as medidas de conservación e xestión que recolle a dita lei figura a adopción, logo de audiencia do sector afectado, de plans de xestión definidos como medidas reguladores da actividade pesqueira e marisqueira.
2. O artigo 3 do Decreto 153/2019, do 21 de novembro, polo que se regula o réxime de conservación e explotación dos recursos marisqueiros e das algas (DOG núm. 233, do 09.12.2019), define os plans de xestión de nova incorporación para recursos, ámbitos zonais ou útiles, equipos e técnicas de marisqueo regulamentarios diferentes aos plans plurianuais de xestión aprobados.

O artigo 19 do mencionado decreto regula a presentación dos plans de xestión de nova incorporación e establece que os mesmos permitirán determinar a viabilidade da explotación antes da súa aprobación como plan de xestión trianual e incorporación ao Plan xeral de explotación marisqueira ou, se é o caso, na orde que aprobe os plans de xestión trianuais de recursos específicos.

3. No punto 4 do artigo 19, o Decreto 153/2019, do 21 de novembro, establece que os plans de xestión de nova incorporación de recursos serán presentados polas confraría ou entidades asociativas do sector antes do 1 de outubro do ano anterior ao de inicio do plan.
4. Por outra parte, o Decreto 153/2019, do 21 de novembro, establece no artigo 18 que:
 - As xefaturas territoriais serán os órganos instrutores do procedemento e realizarán unha fase previa levando a cabo as actuacións necesarias para efectuar unha avaliación das propostas presentadas. Unha vez realizada a avaliación, as propostas avaliadas elevaranse á dirección xeral competente en materia de marisqueo.
 - A dirección xeral competente en materia de marisqueo, logo de audiencia aos interesados, determinará as medidas reguladoras da actividade marisqueira e, de ser o caso, proporá a aprobación do plan, que se realizará mediante orde da consellería competente en materia de marisqueo.
 - Os plans de xestión de nova incorporación serán aprobados por resolución da persoa titular da Consellería do Mar na que se determinará o período de vixencia, que será inferior a tres anos, e non poderá superar o período de aprobación da orde pola que se aprobó o Plan xeral de explotación marisqueira que estea en vigor.
5. O artigo 161 do Decreto 15/2011 do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia (DOG Núm. 31,



do 15.02.2011) establece as modalidades de extracción, o horario de traballo e outros condicionantes para a extracción de navallas e longueiróns.

6. O Real Decreto 550/2020, de 2 de xuño, determinan as condicións de seguridade das actividades de mergullo (BOE núm. 177 do 26.06.2020).
7. O Decreto 64/2008, do 27 de marzo, regula a certificación profesional para a extracción de recursos específicos con técnicas de mergullo na Comunidade Autónoma de Galicia (DOG Núm. 68 do 09.04.2008)
8. O informe do 29.11.2022, da axente de extensión pesqueira da Xefatura Territorial de Celeiro informou favorablemente o plan.
9. O informe do 01.12.2022 do biólogo da Xefatura Comarcal de Ferrol é favorable condicionando á ampliación do número de participantes a unha nova avaliación a realizar a finais do ano 2023.
10. A Dirección Xeral de Desenvolvemento Pesqueiro realiza proposta de resolución de aprobación do plan presentado con base na mencionada proposta.

Así pois, de acordo con todo o anterior, **RESOLVO:**

APROBAR o plan de xestión conxunto de nova incorporación para a conservación e explotación da anemone (*Anemonia viridis*) durante os anos 2023 e 2024 na modalidade de mergullo con suministro de aire dende embarcación das confrarías de pescadores de O Barqueiro e Espasante con vixencia dende a publicación desta resolución ata o 31 de decembro de 2024.

O plan desenvolverase conforme ao presentado pola confraría e as condicións establecidas a continuación:

1. Ámbito do plan

O ámbito da zona de explotación comprende dende a Praia de Morouzos ata Punta do Castro de Vilela.

As subzonas de explotación autorizadas son:

- **Ladrido-Picón:** Porto de Espasante, San Antonio.
- **Estaca de Bares:** As Atravesadas, Campo Torto, A Estaca, Bares, Castro de Vilela.

2. Obxectivos do plan, indicadores e estratexias de actuación para acadar unha xestión sustentable

O plan desenvolverase atendendo aos obxectivos, indicadores e estratexias de actuación resumidos no anexo I.



3. Participantes

Apróbase un número máximo de 2 embarcacións participantes con 6 habilitacións para o ano 2023. O reparto por confrarías será de 1 embarcación e 3 tripulantes para a confraría de Espasante e 1 embarcación e 3 tripulantes para O Barqueiro.

O incremento de embarcacións e habilitacións solicitado para o ano 2024 para acadar un número máximo de 4 embarcacións e 12 habilitacións queda condicionado aos resultados do seguimento do plan durante o ano 2023 e das mostraxes que demostren a viabilidade da ampliación do número de participantes.

Segundo a lexislación vixente non se pode establecer como prescripción específica para a renovación do permiso que os armadores se comprometan a retornar o 1% das vendas en lonxa cando a lonxa de venda correspondente non o faga. O retorno das ventas feitas nunha lonxa diferente a de descarga está regulado no Decreto 419/1993, do 17 de decembro, pola que se refunde a normativa vixente sobre descarga, primeira venda e comercialización dos recursos mariños en fresco, modificado polo Decreto 101/2006, do 8 de xuño.

4. Plan de extracción e medidas de conservación

a) Especies obxectivo e cotas de captura por persoa mariscadora e día

A especie obxectivo é a anemone (*Anemonia viridis* (Forsskål, 1775)).

Apróbase a cota máxima de captura diaria de 15 kg por mergullador enrolado e bordo que solicitan no plan. O peso mínimo dos individuos extraídos deberá ser superior é 15 gr.

b) Horario:

O horario de extracción será de 8.00 h a 14.00 h, tal e como establece o artigo 161.3 do Decreto 15/2011, do 28 de xaneiro.

c) Arte / técnica a emplegar:

A extracción será realizada na modalidade de mergullo con suministro de aire dende superficie e a recollida a man.

Todos os mergulladores deberán ter a tarxeta de mergullador en vigor para poder traballar no plan de xestión, de non ser así a xefatura territorial podería excluílos da apertura mensual.

As intervencións subacuáticas serán realizadas dentro dos límites das atribucións da titulación posuída polo mergullador e sen sobrepasar en ningún caso a profundidade de inmersión autorizada para esa titulación segundo establece o Decreto 64/2008, do 27 de marzo, polo que se regula a certificación profesional para a extracción de recursos específicos con técnicas de mergullo na Comunidade Autónoma de Galicia.

Durante as intervencións subacuáticas cumplirase coas normas de seguridade para o mergullo de extracción de recursos mariños vivos (Sección 5ª do Capítulo III do Real Decreto



550/2020, de 2 de xuño, polo que se determinan as condicións de seguridade das actividades de mergullo).

A conformación dos equipos de traballo das embarcacións serán responsabilidade dos seus titulares e deberán contar cun plan de inmersión autorizado por cada xefe de equipo.

Segundo a proposta de aprobación do plan da xefatura territorial, deberán achegar a información referente á actividade de mergullo para a emisións das resolucións de apertura deste plan de xestión que se establece na proposta de aprobación do plan da xefatura territorial, sen prexuízo das notificacións da actividade que deban realizar segundo o Real Decreto 550/2020, de 2 de xuño.

d) Calendario anual previsto de extracción:

O período autorizado de extracción abrangue os meses de xaneiro e febreiro, e de xullo a decembro (ámbolos dous incluídos).

e) Número probable de días de extracción 40 días.

f) Puntos de control:

O control realizarase nos seguintes puntos, de acordo coa localización definida no plan:

- Porto de Espasante (595623,64-4841671,41)
- Porto de O Barqueiro (604706-4843549)

5. Accións de conservación, mantemento, recuperación ou mellora dos hábitats e zonas de producción:

Contemplan realizar accións de recollida de lixo mariño no marco da estratexia para acadar os obxectivos ecolóxicos propostos.

6. Accións de coidado, control, seguimento protección e vixilancia dos bancos marisqueiros:

A vixilancia será realizada polos gardapescas das confrarías de O Barqueiro e Espasante.

7. Medidas específicas para eliminar prácticas INDNR:

Contemplan tamén levar a cabo medidas específicas para eliminar prácticas INDNR que inclúen formación dirixida a desalentar a pesca ilegal ou non declarada, e o control de actividades por parte da vixilancia contratada para evitar o furtivismo.

8. Plan de comercialización

Lonxa e/ou centro de venda: Lonxas e demais puntos de venda autorizados da comunidade autónoma.



9. Desenvolvemento do plan de xestión

A xefatura territorial da Consellería do Mar en Celeiro autorizará o desenvolvemento das actividades de marisqueo dos plans de xestión, logo de petición da entidade representante do plan, e polo tempo establecido nas resolucións de autorización, conforme ao artigo 20 Decreto 153/2019, do 21 de novembro.

No caso de que non realizarse un seguimento da extracción ou que os resultados non sexan adecuados, a Xefatura Territorial poderá axustar as medidas aprobadas para unha explotación sostible do recurso durante o desenvolvemento do plan de xestión.

10. Control e seguimento

Para mellorar a xestión dos bancos e evitar situacións de sobrepesca é necesario realizar un control do esforzo pesqueiro, das capturas e das tallas. Á data da solicitude da apertura do plan de xestión, terán que ter actualizados os datos da explotación na ferramenta para o seguimento dos plans habilitada pola consellería (AT2 novo formato actualizado). En caso contrario, os datos da explotación deberán ser remitidos regularmente á xefatura territorial correspondente, de xeito que coa solicitude de apertura os técnicos deberán ter a súa disposición os datos anteriores.

Contra esta resolución, que esgota a vía administrativa, poderá interpoñerse, ante a conselleira do Mar, recurso potestativo de reposición no prazo dun mes contado dende o día seguinte ao da súa notificación ou recurso contencioso-administrativo ante a sala do contencioso-administrativo do Tribunal Superior de Xustiza, no prazo de dous meses contados a partir do día seguinte ao da súa notificación, segundo o establecido nos artigos 123 e 124 da Lei 39/2015, do 1 de outubro, de Procedemento Administrativo Común das Administracións Públicas (BOE núm. 236, do 02/10/2015). En todo caso, non se poderá interpoñer recurso contencioso-administrativo ata que sexa resolto expresamente ou se produza a desestimación presunta do recurso potestativo de reposición.

Esta resolución notifícase á confraría representante do plan de xestión consonte ó artigo 40 da Lei 39/2015 do 1 de outubro.

A conselleira do Mar

Rosa M^a Quintana Carballo

(Sinatura electrónica)





ANEXO I

Obxectivos biolóxicos:

Especies	Obxectivo Xeral	Obxectivo operacional	Indicador	Variable	Unidades	Valor ano 1	Valor ano 2	Valor ano 3	Nivel referencia anos 1,2,3
Anemone (<i>Anemonia viridis</i>)	Incrementar/manter a calidade das capturas	Incrementar/mantener o tamaño dos exemplares capturados	Tamaño medio dos exemplares capturados	Peso	g	17	17	17	17

Estratexias a adoptar para acadar os obxectivos

Mediante os controis de talla mensuais, comprobarase que o peso medio dos exemplares capturados non bixe de 17 g. No caso de que bixe procederase a pechar ese estrato do banco e pasarse a traballar noutro estrato. O valor actual e o nivel de referencia do indicador actualizarase ao final do primeiro ano de vixencia do plan.

Anexo (continuación)

Obxectivos ecológicos:

Bancos	Obxectivo Xeral	Obxectivo operacional	Indicador	Variable	Unidades	Valor año 1	Valor año 2	Valor año 3	Nivel referencia anos 1,2,3
Todos os incluídos no ámbito do plan	Controlar a presenza de lixo mariño.	Incrementar/manter o esforzo de limpeza de lixo mariño.	Tratamento de lixo mariño.	Días de limpeza de lixo mariño	Días	40	40	-	-
Todos os incluídos no ámbito do plan	Controlar a presenza de lixo mariño.	Incrementar/manter o esforzo de limpeza de lixo mariño.	Tratamento de lixo mariño.	Peso retirado	Kg	0	0	-	-

Estratexias a adoptar para acadar os obxectivos

Cada día de extracción de anemone, no caso de atopar lixo na zona de recolección, os mergulladores recollerán o lixo mariño. O lixo recollido será pesado e depositado nos contedores correspondentes. No caso de atopar moito lixo nunha zona concreta solicitaranse días de limpeza para esa zona. O seguimento do obxectivo ecológico farase cubrindo a N_Variable_11 do AT2. O valor actual e o nivel de referencia do indicador actualizarase ao final do primeiro ano de vixencia do plan.



Anexo (continuación)

Obxectivos socioeconómicos:

Obxectivo Xeral	Obxectivo operacional	Indicador	Variable	Unidades	Valor año 1	Valor año 2	Valor año 3	Nivel referencia anos 1,2,3
Incrementar/manter a asistencia á extracción.	Incrementar/manter a proporción entre os asistentes diarios e autorizados	% entre asistentes diarios e autorizados	% de persoas asistentes	%	100	100	-	100

Estratexias a adoptar para acadar os obxectivos

A estratexia para acadar o obxectivo socioeconómico será mediante acordo por unanimidade dos días de extracción de anemone con compromiso de participación nos mesmos por parte de todas as embarcacións.

